



Die Gsalzene



Noch 6 Milliarde Kilomeeter Flug hett d' Sonde sich blatziert
Doch d' Rosetta hett uff däm Komet denn zimmlig scheps pharggiert
D' ESA hett vrlute loo: Das Pharggbrobleem hett me gsee koo
Drum haig me fir die Sonde au bewusst e Frauenamme gnoo

S gitt beesi Gricht in unsrem Land: Dr Fuessball machi dumm
Doch Schutte isch e Läbensschuel – mir saage Eich worum
Bi de Dääge-Brieder leersch mit Finger rächne bis uff drei
Dr Herr Busacca zaigt s'Rasiere mit em neie Freistosssprey
Bi Luzärn do lersch als näggschts mit Niiderlaage feertigzwärde
Bim FC Sion usserdäm: S gitt nur ai Gott auf dääre Äärde
Bi GC-Haimspil kasch im Staadion s'Ainsamsyy drainiere
Uff em Brügglifäld in Aarau denn no Aggerbau studiere
Und bim FCB im Joggeli isch jede gärn drbyy
Wo aimool in sim Lääbe wetti Schwyzermaschter syy

Friener hämmer Hardrock, Big Mac und e Jointli ynezooge
Hit längt fir die blai'ch' Veganerjugend Randesaft als Drooge
Und dr Grund, worum die s' Helen Fischer stundelang uushalte:
Die sinn ganz aifach physisch z'schwach zem s' Raadio abschalte!

E WM z' Russland und denn z' Qatar isch fir d' Sportwält s' Allerbescht
Dr Suuberwäschbricht vo dr FIFA leegt das zwyyfelsooni fescht
Lut dr Ethikkommission isch Korruption komplett uusszschliesse
Joo und näggscht Joor duet dr Ryy vo Rotterdam uff Baasel fliesse!

E Drittel Frauequote wott dr liebi Gott doch nid uff Äärde
Sunsch hätt dr Hailig Gaischt oder dr Jesus wyblig miese wäärde
Und nadyrlig isch au Gott kai Frau, das gseet me doodraa guet
Dass Zalando nid scho lang diräggt in Himmel liefre duet

Dr Herr Schawinski isch e Glassekämpfer, setzt sich lutstargg yy
Geege Gneebeligg, fir Redefreiheit und Demokratie
Doch wenn dr Roger schwaafle heersch, denn fällt
d' Erkenntnis gar nid schwäär

Dass e Beschränggig vo dr Redefreiheit isserscht wintschbaar wäär

dr erschti Monschertväs

Und d' Baslere said „Joo
D' Baselbieter kenne koo
Mir sotte jetze ändligg fusioniere
Fir d' Region zaig yych kai Bammel
Nimm e Buuresoon vo Ammel
Au wenn mi das e weeni duet geniere!“

Vo Schönebuech bis Ammel – wie kennt's au anderscht syy

Isch d' Meerhait vo de Rammel bim Flyrte hindedryy
Die blyybe lieber Single, dr Grund drfir isch glaar
Mit some Dialägg do kunnt doch kaini mit an Draualtaar
Und schlimmer no die sinn nid mol bi Parship vrmittelbaar!

Und vo dr Baselbieter Horde
Isch d' Regierig nei gwäält worde
Und dr SP duet das iibermäässig stingge
D' Regierig gseesch rächts blingge
Und die Lingge glopfe d' Fingge
Jetzt blyybt ne numme no durch s' Fänschter z'wingge

Dr Isak Reber said zem Weber:
„Scheen, mir blyybe Sässelgläaber
Drumm mache mir kai Schritt zem fusioniere
Mir wänn nid ummeschmuuse
Mit Grossketz us Wesselshuuse
Das duet uns offe gstande eenter gruuse

Wie kunnt's fir d'Basler Dante und fir dr Baselbieter?
Si wird en alti Jumpfre, är blyybt e Ladehieter!
S'wird wyter ummegschritte, wie immne Affedanz
Drbi hämmir scho d'Leesig, die iberzyygt doch voll und ganz
E Baartherapie mit em Shiva Mike uff dr Hilfteschanz!

und dr eigendligg Monschertväs

S gitt nur ai Wääg us dääre Noot:
Die Gsalzene in Bundesroot!
Drei Mussgedier statt siebe Zwäärgli
Denn wäär das Land glyy iibrem Bäärgli

Zem d'Nordweschtschwyz vorwärts dryybe
Dien mir Gsetz mit Pointe schryybe
Per Noträcht ooni Landroots-Gfaasel
Gäbs Fasnacht numme no in Basel

Mir wurde uns kai bitz geniere
S' Banggegsetz grad revidiere
Vrbiete Schnitzelbängg ganz fyys
Und gwinne soo dr Zyyschtigsbryys

Und bim ÖV iber d' Gränze
Gäbs no ebbis glains z' ergänze
Zem Sozialkeschte iispaare
Derf d' Linie 8 nur uusefaare

Au fir unsri Autobaane
Wurde mir neyi Regle blaane
Wenn Usfaarte in Zyri ände
Derfsch ab sofort strofloos wände!

Denn lemmer neii Schilder stanze
„Tempo 30 uff Schisprungschanze“
Dr Simon Amman, 's wär so schlicht
Miesst nimme brämse mit em Gsicht

Au ooni uns – jetzt miend iir loose
Goot bolytisch mängs in d' Hoose
So sin em Griene Gerry Müller
Sini Selfies ächt e Gnüller
Äär sitzt im Stadrootssaal in Baade
D' Hoose dunde bis zer Waade
Und hebd sii iPhone – uns wird's schlächt
Vor si kimmerligs Gemächt

In Baasel isch bi Grien und Root
D' Erotik bald scho klinisch doot
Dasch d' Konsequänz – mir miens bedoone
Vo z' vil vrkeersberuigde Zoone!

In Kanton Zug duets nid scheniere
Dass Grien und Rächts wild kopuliere
Drum steert sich Grien dert nimm so seer
Am Individualverkeer!

Mir diens jetzt nomool boschtuliere
D' Schwyz muess ändligg reagiere
S gitt nur ai Wääg us dääre Noot:
Die Gsalzene in Bundesroot!

www.diegsalzene.ch und im Facebook

Wotsch d Fasnacht mol vo inne gsee – kumm doch zue dr BSG!

www.schnitzelbängg.ch